

IN GAIN KERK OF KLOOSTER

Op zotterdag 18 september was wie, mit n bult aandern, in Glenz. Over t hoogholtje noar dij mooie kerk op wier. Nuigd deur Harma Helmantel en Klaas Pieterman. Om der bie te wezen as t bouk " Gezondhaid en Groutnis" van hom oetlangd worden zol aan perf.dr.Siemon Reker.

n Bouk doar joaren aan aarbaid is. Joaren lustern, onthollen, opschrieven, vasthollen, oetvigelaaiern en oetpluzen van alliteroatsies in t Grunnegers.

Alliteroatsies, ie waiten wel:roem en rij, steun en stiep, ie kennen ook dij haile laange; Wel wait woar Wilm Wever woont of messchain ain dij nog langer is, mor din in t nederlands: Meisje, met je mooie mondje, moet je met je moeder mee?

t Is n bouk worden van 126 bladzieden. Boorndevol mit zegswiezen en spreuken. Van " n aai is n aai", zee boer tot aan "t is nait aaltied zummer en zundag".

n Bouk om zulf te hebben, om deur te snuustern, om van deur te geven. Messchain wait ie nog wel n alliteroatsie dij Klaas nait vonden het. Opschrieven en deurgeven! Mie ducht dat ik al ain heb: " hai komt in gain kerk of klooster", wat volgens mie bedudt dat ain - joaren leden vanzulf - inderdoad nait in kerk of klooster kwam.

t Bouk is mooi oetgeven deur Oetgever Vliedorp in Houwerziel. Veur 10,95 euro krieg ie t as ie bellen mit 0595-402297. Vot doun!